

VENDIM
Nr. 114, datë 22.8.2012

MBI KËRKESËN E “CEZ SHPËRNDARJE” SHA PËR MOSZHVILLIMIN E ANKANDIT TË KAPACITETEVE NË DREJTIMIN IMPORT, MUAJT: SHTATOR, TETOR, NËNTOR, DHJETOR TË VITIT 2012

Në mbështetje të nenit 8 pika 2 germa “ç” paragrafi “ii” dhe 9 të ligjit nr. 9072, datë 22.5.2003 “Për sektorin e energjisë elektrike”, të ndryshuar, pikës 7 germa “b” të Modelit të Tregut të Energjisë Elektrike, të miratuar me vendimin e Këshillit të Ministrave nr. 338, datë 19.3.2008, të ndryshuar, si dhe kapitullit X të “Rregullave të tregut shqiptar të energjisë elektrike”, të miratuara nga ERE me vendimin e Bordit të Komisionerëve nr. 68, datë 23.6.2008, Bordi i Komisionerëve të ERE-s, në mbledhjen e tij të datës 22.8.2012, pasi shqyrtoi kërkesat e shoqërisë “CEZ Shpërndarje” sh.a. me nr. 4387/2 prot., datë 27.7.2012 dhe nr. 4805 prot., datë 30.7.2012, si dhe relacionin e Drejtorisë Juridike dhe të Mbrojtjes së Konsumatorit dhe Drejtorisë së Licencimit dhe Monitorimit të Tregut,

konstaton se:

- Nivelet e rezervës hidrike në kaskadën e lumit Drin, si dhe basenet e tjera të hec-eve që operojnë në vendin tonë janë të ulëta. Niveli i ujit në liqenin e Fierzës është në nivelin 281.31 metra dhe në fund të muajit gusht, pritët të shkojë në 265 metra, nivele këto që bëjnë të pamundur garantimin e furnizimit me energji elektrike të konsumatorëve në periudhën në vijim.

- “CEZ Shpërndarje” është subjekti përgjegjës për të mbuluar humbjet jo vetëm për muajin aktual dhe në vijim por edhe për periudhën pararendëse, si pasojë e mbulimit të diferencës së krijuar me KESH sh.a., dhe sa më sipër reflekton në një rritje të kërkesës për energji dhe si të tillë të sasisë së energjisë elektrike për t’u importuar nga CEZ.

- Pretendimi i paraqitur nga ana e “CEZ Shpërndarje” për tendencë të bllokimit të kapaciteteve nga tregtarët, të cilët nuk rezultojnë të kenë kontrata efektive dhe praktikisht nuk përdoren ose spekulohet përmes çmimeve shumë të larta në shitjen e energjisë elektrike, nuk është vërtetuar nga asnjë dokument provues të depozituar nga “CEZ Shpërndarje”.

- Nga të dhënat e raportuara nga OST sh.a. dhe KESH sh.a., sipas shkresës nr. 3714 prot., datë 14.8.2012, “CEZ Shpërndarje” sh.a., megjithëse bazuar në vendimin nr. 111, datë 31.7.2012 të Bordit të Komisionerëve të ERE-s, i janë alokuar falas për muajin gusht 2012, kapacitetet e interkonjeksionit të drejtimit të importit me linjat e veriut për sasinë 80 MW, sërish nuk ka përmbushur detyrimin për importin e plotë të humbjeve në rrjetin e shpërndarjes.

- Gjithashtu, po sipas këtij komunikimi, është ngritur shqetësimi i mosimportimit nga CEZ Shpërndarje, jo vetëm në kapacitetin e kërkuar, por importi kryhet në kapacitete jo të njëtrajtshme dhe jo në bandë.

- Kërkesa e OST sh.a. për alokimin e kapaciteteve për “CEZ Shpërndarje” sh.a. kundrejt pagesës së njëjtë me ato të ankandëve vjetore, nuk u pranua nga “CEZ Shpërndarje”, por nga ana tjetër në gjykimin tonë kjo kërkesë e OST-së do të vendoste të gjithë pjesëmarrësit e tregut minimalisht në kushte të barabarta për efekt të pagesave.

- Siç është bërë prezent edhe më parë, pas disa nga komunikimeve të ERE-s me Sekr etariatit e Komunitetit të Energjisë, ky i fundit është shprehur dakord, që për një periudhë transitorë, por jo më vonë se fundi i vitit 2012, ERE-ja të mundë të lejojë përdorimin nga “CEZ Shpërndarje” të kapaciteteve të limituara jashtë procedurave të ankandit të alokimit të kapaciteteve, për aq sa nevojitet për të siguruar furnizimin publik të konsumatorëve.

- Për gjithë sa më sipër, me qëllim moscenimin e furnizimit pa ndërprerje me energji elektrike të konsumatorëve tariforë dhe të kualifikuar të energjisë elektrike, bazuar në nenin 8 pika 2 germa “ç” paragrafi “ii” të ligjit nr. 9072, datë 22.5.2003 “Për sektorin e energjisë elektrike”, të ndryshuar, sipas të cilit ERE-ja është autoriteti përgjegjës për mbrojtjen e interesave të konsumatorëve, duke garantuar ndër të tjera, që kushtet e shërbimit, si: cilësia, efica, qëndrueshmëria dhe siguria e furnizimit me energji elektrike janë të përshtatshme, sipas rrethanave, si dhe meqenëse ERE-ja është gjithashtu autoriteti

përgjegjës për miratimin e rregullave të alokimit të kapaciteteve të interkonjeksionit, Bordi i Komisionerëve

VENDOSI:

1. Alokimin e kapaciteteve disponibël të interkonjeksionit për muajin shtator 2012, si më poshtë:
 - a) Shoqërisë “CEZ Shpërndarje” sh.a. për sasinë 155 MW, për mbulimin e humbjeve të ndara sipas kufirit dhe periudhave të përcaktuara nga OST sh.a. (shkresa e OST sh.a. nr. 3851/1, datë 8.8.2012);
 - b) Klientëve të kualifikuar për sasinë 45 MW, të ndarë proporcionalisht, sipas kufirit dhe periudhave të përcaktuara nga OST sh.a.
2. Alokimi i kapaciteteve sipas pikës 1 të këtij vendimi, të bëhet kundrejt pagesës për kapacitet sipas skemës:

Kufiri	Çmimi (€/MWh)
Mali i Zi	3.18
Kosovë	3.13
Greqi	0.11

3. “CEZ Shpërndarje” sh.a. dhe furnizuesit e kualifikuar të bëjnë nominimet dhe pagesat për kapacitetet e interkonjeksionit, sipas pikave 1 dhe 2 të këtij vendimi, për muajin shtator 2012, deri në datën 27.8.2012.

4. OST sh.a. të zhvillojë ankandin për muajin shtator 2012, brenda datës 29.8.2012, në rast të moszbatimit të pikave 2 dhe 3 të këtij vendimi.

5. Drejtoria Juridike dhe e Mbrojtjes së Konsumatorit të njoftojë shoqëritë OST sh.a. dhe “CEZ Shpërndarje” sh.a., për vendimin e Bordit të Komisionerëve.

Ky vendim hyn në fuqi menjëherë.

Ky vendim botohet në Fletoren Zyrtare.

KRYETARI
Sokol Ramadani